

**PRIVREDNA KOMORA KANTONA  
SARAJEVO**

**gosp. Kemal Grebo, predsjednik**

*Fn: Komora pismo UP*

Broj: 1772/13

Sarajevo, 11.02.2013. god

**PREDMET Inicijativa za formiranje Udruženja poslodavaca KS**

Povodom inicijative Predsjednika Privredne komora Kantona Sarajevo za formiranje Udruženja poslodavaca Kantona Sarajevo u okviru Privredne komore, nakon rasprave na Upravi Društva po ovome pitanju, želimo da Vas obavijestimo o našem stavu.

Centrotans Eurolines je privredna organizacija koja svoje poslovanje zasniva na poštivanju i primjeni Zakona kojim se reguliraju uslovi za rad privrednih društava u okviru kantona, entiteta i cijele Bosne i Hercegovine. U današnjim uslovima, koje karakterizira eskalacija raznih nezakonitih ponašanja od strane organa vlasti i određenog broja privrednih subjekata, uporno insistiranje i poštovanje Zakona veoma često dovodi do izuzetnih teškoća u poslovanju pa i nestanka firmi koje se tako ponašaju. Međutim, duboko smo uvjereni i opredijeljeni da samo poslovanje u uređenom i na zakonu zasnovanom privrednom ambijentu može biti rješenje za brojne nagomilane probleme koji opterećuju poslijeratni razvoj Bosne i Hercegovine.

Centrotans Eurolines, od osnivanja a posebno u postratnom periodu, snažno podržava komorski sistem na svim nivoima društvenog uređenja u okviru Bosne i Hercegovine. Kao što je poznato Centrotans i njegovi kadrovi su nosioci brojnih inicijativa i funkcija u sva tri nivoa komorskog sistema u BiH. U svojim nastojanjima da doprinesu izgradnji i razvoju komorskog sistema a na taj način i same BiH, veoma često poslovni interes same kompanije stavljali smo u drugi plan, radi čega smo u određenim situacijama imali direktne štete u pogledu gubljenja prava, statusa i pozicije na tržištu Bosne i Hercegovine. Smatramo da komorski sistem ima svoje mjesto i ulogu u ukupnom ambijentu Bosne i Hercegovine, jer je to snažna poluga za definisanje problema i njihovo sistemsko rješavanje.

Sa istim ciljem, naši kadrovi su uključeni u sistem organizacija udruženja poslodavaca na kantonalnom, federalnom i državnom nivou. Smatramo da smo u prethodnom periodu doprinijeli postizanju dijaloga o bitnim socijalnim i privrednim pitanjima sa predstavnicima vlasti i sindikata.

Naše mišljenje u vezi vaše inicijative za formiranje paralelnog udruženja poslodavaca u Kantonu Sarajevo je sljedeće:

- Inicijativa za formiranje Udruženja poslodavaca u okviru Privredne komore Kantona Sarajevo je nelogična, kontraproduktivna i krajnjoj liniji može imati samo štetne posljedice na položaj i status poslodavaca, Komore kao i ukupnog privrednog sistema u Kantonu Sarajevo.

- Polazeći od toga da je funkcija Komore definisana Zakonom, smatramo da ne postoji nikakav opravdan razlog za pokušaj stvaranja paralelnih sistema udruženja poslodavaca, jer bi to u konačnosti imalo kao rezultat slabljenje pozicije poslodavaca prema ostalim parterima u tripartitetnom dijalogu, prema Vladi i Sindikatu Kantona Sarajevo.
- Očigledna je želja određenih predstavnika Komore da se putem udruženja poslodavaca u okviru Komore, ako bude formirano, utiče na procese, donošenja Zakona i odluke koje se odnose na položaj i status Komore. To je apsurdna konstrukcija koje u praksi ne može imati nikakvo dejstvo jer je logično da će poslodavci uvijek u dogovorima zastupati svoje interese i problematiku koja je vezana za privredni sistem a ne može se očekivati da će u bilo kojoj situaciji zastupati parcijalne interese Komore.
- Pri pozivu za delegiranje zastupnika za osnivačku skupštinu predstavnici Komore su nagovijestili da bi članstvo u eventualnom novom udruženju poslodavaca bilo potpuno besplatno i da bi tom udruženju stručne službe Komore Kantona Sarajevo pružale besplatno usluge. Takav prijedlog, odnosno nekakva odluka po tom pitanju je potpuno nezakonita i štetna za sve članove Komore Kantona Sarajevo jer bi se na taj način nenamjenski trošila sredstva koje Komora, na osnovu usvojenog Finansijskog programa i Programa rada, obezbjeđuje iz članarina za pokriće svojih troškova poslovanja.
- Programom rada za 2013. godinu, koji je usvojen na Skupštini Privredne komore Kantona Sarajevo, nije predviđena bilo kakva aktivnost oko formiranja udruženja poslodavaca tako da sve radnje koje samoinicijativno poduzima Predsjednik komore su štetne i nelegalne.
- Imajući u vidu da je naša kompanija već član Udruženja poslodavaca Kantona Sarajevo, te da aktivno participira u radu i finansiranju Privredne komore KS, mišljenja smo da najavljeno formiranje paralelnog udruženja, dovodi u pitanje budućnost Privredne komore i članstva u istoj, kako našeg tako i ostalih privrednih subjekata u Kantonu Sarajevo.

Na osnovu svega izloženog smatramo da treba obustaviti sve dalje aktivnosti oko ove inicijative, te eventualne međusobne nesuglasice između Privredne komore i Udruženja poslodavac Kantona Sarajevo, u naredno periodu rješavati dogovorom ovlaštenih predstavnika.

S poštovanjem,

DOSTAVLJENO:

- Skupština PK KS – predsjedniku,
- Upravni odbor PK KS – svim članovima,
- Nadzorni odbor PK KS– svim članovima.

GENERALNI DIREKTOR  
Mr. sc. Safudin Čengić